

# *MAYENDAMENO*

 Ni itumezi, muzwale. Ni itumezi, Muzwale Hoekstra.

Ki manzibwana, kwa Houston. Ni talima taba ye kuba litohonolo lelituna, ka kuba mo hape busihu bo mwa Houston. Se li lilimo limo kuzwa fo Ni bezi kwanu. Mi Ne niinzi, inge ni teeleza ku mañi ni mañi wa babuleli baa.

<sup>2</sup> Mi ka zazi leliñwi, hane Ni itukisize ka lika zeñwi, kwa sibaka sisili, mi Na ziba kuli bana bani ne ba talimani ni lifu, Na hupula kuli, "Haiba sesiñwi si ezahala kwa bana bani, Hanina ku iswalela ili na," ka za kusa taha kwanu ku tofa maikuto aka ni kueza kaufela se Ni kona, kuli ni tuse me yo ni ndate, mane ni kwa bana baa, ni kueza kaufela se Ni kona kwa kupilisa bupilo bwa bona.

<sup>3</sup> Mi Houston ina ni...ki sibaka sa kupuzo kuna. Sina ni likupuzo zetuna zeñata hahulu zeo Ni latile hahulu kuzwa ha Ni kile na potela kwanu lwa pili lilimo limo zeñata kafoo, ona kwanu ku ba Herald Of Faith, Muzwale Kidson, mi ni kwanu kwa muyaho hane Nili kwanu ni Muzwale Raymond Richey ni bakutazi ba muleneñi.

<sup>4</sup> Mi cwale, eeni sha, Bo Ayers, Bo Kipperman, busihu bone ipakile kamera kuli ne Ni sa buleli buhata. Neli Niti. Mi cwale liito la mushini wa kamera hane li to swala pono ya...kamba, isiñi pono; kono niti yateni. Yena Kreste ye lu kutaza ni lilato cwalo, nali ni luna. Na sepisize kuba ni luna, mi ni kamera ya to napula siswaniso sa Hae. Linako zeñata Ni bulezi, mwa linako za kwa mulaho, kuli—kuli Ne ni bonanga Liseli lani ka nako kaufela. Kono linako zeñwi sicaba ne si kakanyanga ka Lona, kuli mane ne mu ka lumela kuli hakulata ku cwalo, kono busihu bwani ne bu pakile cwalo. Yani neli nako yapili ha ne Li swanisizwe.

<sup>5</sup> Kuzwelela ona fani, se Li napuzwi linako zeñata. Mwa Germany cwanoñu nyana fa, hane ni taha, hane kuna ni tozo, mi ni ha Ne li kutile hape. Mi lika zani ha ki za kupahamisa mutu, kono ki kupaka Kubateni kwa Jesu Kreste mwahala sicaba sa Hae.

<sup>6</sup> Mi lu lumela kuli Mulena Jesu yaswana uteni mwahali mo busihu bo, ku to lu tusa mwa taba ye. Mi Ni lumela kuli Una ni takazo yetuna hahulu ku zona kufita mo lubezi luna. Mi lulii Ni utwela butuku bashemi ba bana baa, mane ni swalisana ni muuna ufi ni ufi hamoho musali ufi ni ufi kaufela ya lika ku ba yangwela mwa meno a lifu.

<sup>7</sup> Mi, cwale, Ni utwisisa kuli wo ha ki mukopano wa ancafazo, kono fela ki—ki mukoloko wa mukopano wa litapelo oliteni

bakeñisa mioyo yeli mwa miluti ya lifu ye. Mi kacwalo Ni liyehile. Hanina kubulela hahulu nako yetelete.

<sup>8</sup> Kono Ni tabela kunga palo, kamba tuto, nitaluse, kuzwa kwa palo ye Ni bata kubala ku yona mwa libaka zepeli za Liñolo. Mi mina babana ni Libibele, haiba muka apula hamoho nina fa nako nyana fela, mwa buka ya Mafilipi, kauhanyo ya 1, ni timana ya 20 ya kauhanyo ya 1 ya Mafilipi.

*Mi ki se ni libelezi hahulu mi nina ni sepo, ya kuli Hanina kuswabiswa ki sesiñwi, kono...ni sa sabi, sina kamita, Kreste uka lumbwa cwalo mwa mubili waka, nihaiba ka...kupila kwaka, kamba...ka kushwa kwaka.*

<sup>9</sup> Mi he, hape, ni mwa Buka ya Likezo, kauhanyo ya 2 ni timana ya 30. Nika bala hape ni 25 kuyo fita fa 30.

*Kakuli Davida ha mu uize kuli, kakuli Ni beile Mulena kamita fapila ka, kakuli uinzi ku laka la bulyo, Hanina ku nyanganyiswa:*

*Ki fo pilu yaka itabile, mi lulimi lwaka lu nyakalalile; mane ni yona nama yaka ika pumula ka sepo:*

*Kakuli ha Una kuliselela moyo waka mwa sibaka sa baba shwile, ya ketilwe ni Wena ha Una ku mutuhela kuli abone kubola.*

*Uni bonisize nzila ya bupilo; uka ni kolisa tabo yezwa mwa pata ya hao.*

*Bana bahesu, ni ka mi bulelela patalaza ka mupatriareka Davida, kuli u shwile mi u bulukilwe, mane libita la hae lisali ni luna kutofita ni lona lizazi le.*

*Mi kakuli neli mupolofita, mi a ziba kuli Mulimu umu sepisize ka luci, kuli ka lusika lwa hae, kuya ka butu, Kreste u ka zwa ku yena kuli aine fa lubona lwa hae;*

*Yena ka kuiponela seo pili ubulezi ka zuho ya Kreste, haize kuli moyo wa hae hauna kutuhelelwa mwa sibaka sa baba shwile, kamba nihaiba yona nama ya hae kubona kubola.*

<sup>10</sup> Halu inamiseni litoho za luna fa nako nyana kwa tapelo.

<sup>11</sup> Ndata luna yakwa Lihalimu, lu itumezi ku Wena ka sishemo. Mi yeo luli ki niti, Mulena, kona haluli mo busihu bo, ki kukupa sishemo. Ne lusike lwa kupa ze haiba haluna tumelo ya kulumela kuli ne ika fiwa ku luna. Baana ba fufile mwahala naha kaufela, ni litapelo liswelu ku ezahala kai ni kai, kutaha ku Wena, kuli bupilo bwa be lu lwanela ba bukone kubukelezwa. Mulena, lu kupela mata bahame ni baha ndate ba batu ba sanana ba.

<sup>12</sup> Mi kuya ka mo lu utwisiseza, kuli, mutangana yo u file bupilo bwa hae ku Wena mi ubata ku Ku sebeleza. Mi sina ha lu utwile

alimuñwi wa bakutazi hana ize, kuli, u bata kuba mubuleli wa Evangelii. Ni lapela Mulimu kuli Ufe kolo ye ku mutangana yoo.

<sup>13</sup> Ulu swalele libi za luna, kenisa lipilu za luna kwa mihipupo yemaswe, ni se si kona kuba mwa nzila ya luna ku lu tabelia litapelo za luna kwa ku sa alabiwa kwa sicaba se.

<sup>14</sup> Sina ha lu balile Linzwi la Hao, lu ziba kuli sibeli sa lihalimu ni lifasi li ka fela kono Manzwi a Hao hana kufela. Lu lapela kuli U lu ekeleze, ka Moya o Kenile, tuto ye luka nga, yekaba tato ya Hao ya Bumulimu mwa taba ye cwale, sina ha lu utwile muyemeli wa kuta ni babañwi baba bulezi. Mi lu lapela fela kuli lu fumane ona se lutokwa kueza se si tatama. Ki ufi muhato wa luna otatama o luna ni kueza? Mulena, luteni mo ku ueza. U zibise ku luna, Mulena, kuya ka Linzwi la Hao. Kakuli lu li kupaka Libizo la Mwana Hao, yena Mulena Jesu. Amen.

<sup>15</sup> Ka kubala litimana nyana ze, mi Ni lemuha kuli nako yateni ki yetuna, bakeñisa zeliteni ku yona. Ni nahana kuli, hane Ni utwile ni ku amuhela telegiramu ya boma yani, “Kucwani haiba yani neli mwana ka wa mushimani yanali ku zani, kamba wa musizana?” Mi Na... Lu bata kubeya lika kaufela ze lukona ku zona.

<sup>16</sup> Mi babañwi bakona kubulela kuli, “Kihande, sani neli fela siemba se si nyinyani fela sa Linzwi, so balile, Muzwale Branham.” Kihande, seo sakona kuba niti, ni sona. Kono, mwa bona, ha ki bu—bu buima, kamba buñata bwa manzwi. Ki ze taluswa. Ki—ki zona fela... Seo sili sona, ki sepiso ya Mulimu.

<sup>17</sup> Mi Ni bata kunga ku yona busihu bo, kuzwa mwa palo ye busihu bo, kamba palo ya tuto yakuli: *Mayendameno*.

<sup>18</sup> Ni ketile palo ye, fa nako nyana yefitile, inge ni inzi mwa sibaka saka sa motela, kakuli Ni sepa kuli cwale lu tokwa lika zeñwi za niti, ili mayendameno olukona ku kumalela teñi ni kuziba kuli ki niti. Mwa hola yetata sina ye, lu lukela kuba ni sesiñwi se lu ikolwisisa ka niti, se si lukile, sika se lukona ku kumalela ku sona, ili kuziba kana, taba yakuli izamaya cwani.

<sup>19</sup> Cwale, kuya ka—ka Webster, *mayendameno*, ka ona, ki “kutokwa fo kufelela mata,” mi luli kona “mafelelezo.” Mi *mafelelezo* ki yona “amen.” Kona mayendameno. Sina mo i... Ani kona mafelelezo. Zeo kona lika kaufela.

<sup>20</sup> Cwale, sika kaufela se si kile sa fumaneha ku zeliteni mwa lifasi, li tamehile fa mayendameno amañwi. Haukonu kueza sika konji haiba una ni fo sepile mi ili fo utomile.

<sup>21</sup> Mucaha haiba una ni kunyala musizana, u lukela kuziba mukwa wa musali yo. Kamba musizana una ni kuziba mukwa wa mucaha wateni, sika sakona kuswala ku sona musizana yoo. “Kana muuna you kaba muuna ya lukile nji? Kana uka ni lukela kuli abe muuna ka nji?” “Kana musali yo uka ni fa, mwa bupilo, se Ni—se Ni kulubela ku yena, likuta ni zeñwi cwalo?” Mi kipeto

ilukela kuba fokuñwi fo bakona kutoma buitamo bwa—bwa bona, ka kuziba kuli kuna ni sesiñwi se si ka swala. Mi leo kona libaka le lu ba tiseza kwa keleke, ni kwa Linzwi la Mulimu, kuli babe ni mayendameno a tamilwe ao.

<sup>22</sup> Cwale, Paulusi fa, sina ha lu bona, nana ni mayendameno fa na swalelezi, bupilo bwa hae kaufela, kasamulaho wa cincheho ya hae, bwani neli: bupilo bo bu tomile ku Kreste! Mi ha ki sibaka ni seo kwa kuba ni mayendameno: bupilo bo bu tomilwe ku Kreste! Neli bupilo bob u shutana kufita bwa na pilile ka nako yeñwi, kakuli naize, “Bupilo bo Ni pila cwale,” bo ne bu shutana ku bwa an pilile.

<sup>23</sup> Mi sekutaha nako yeo Paulusi aba ni tuto ye yona yene mukonisize kuba ni buiketelo bo. Kakuli, Paulusi neli muuna yomutuna, ya mata mwahala Majuda, mi nali—nali muituti yomutuna wa za bumulimu, kono na sa zibi hande ka za mayemo a hae. Kono zazi leliñwi, fa musipili kuliba kwa Damaseka, Liseli kileo, Siita sa Mulilo, sa tuluka kuzwa kwa Lihalimu. Mi Paulusi, kakuba Mujuda, na zibile hande kuli Liseli le, Siita sa Mulilo, neli sona Sika luli sene sina ni, Mulimu yana zamaisize sicaba kuzwa mwa Egepita. Ne ba latelezi ona Siita sa Mulilo se. Kacwalo, kakuba Mujuda, ali ku Yena, kapili, “Mulena, ki Wena Mañi?” Na Mu zibile ka kuba “Mulena,” kono, “Ki Wena Mañi?”

<sup>24</sup> Mi Linzwi lataha kuzwa mwa Siita sa Mulilo lali, “Kina Jesu, mi kutata kuli ulahake kwa miwayo.” Kuzwa ka yona nako yani kuya kwapili, Paulusi a ziba kuli Jehova wa Testamente ya Kale neli Jesu wa ye Nca. Mi aba ni sa na kumalezi ku sona, mi kona mwa na konezi kuñola buka ya Maheberu.

<sup>25</sup> Cwale, haiba mina, mwa bupilo bwa mina muba ni mayendameno, muka eza lika ze mu sa koni kueza ka buino bwa butu fela, sihulu haiba muna ni bupilo bo bu yendamezi ku Mulimu. Bupilo bo bu yendamezi ku Mulimu bu ka eza mutu kuba ni likezo za sa koni kueza ka butu fela; ka kuipitela luli, kuicemela. Ki kabakalañi bupilo bwa Mukreste habuli bo bu ipitezi hahulu ni ku icemela? Kakuli utalimezi kwa Linzwi la Mulimu, ili bo bu sa zibahali mane kwa lifasi kacenu.

<sup>26</sup> Cwale, luna ni likeleke, mi luna ni likopano, mi luna ni bulapeli, oh, ki zeñata mwahala zona, mwahala lifasi.

<sup>27</sup> Mwahala linako zaka zesupa za kupotoloha, kuzwa ka nako hane Ni li ni mina kwa Houston, Ni bile ni zibo yeñata ka milimu ni bulapeli bwa lifasi le. Kono zeo ha ki zona ze Ni ambola ka zona.

<sup>28</sup> Ni bulela ka za mayendameno, kutamahana ni Kreste. Konakuli, si mieza kuba mutu ya—ya ipitezi. Muka eza lika ze ipitezi. Minahano ya mina kaufela ika shutana kufita mone mu ezezanga, kakuli mufumaní sika sesiñwi, se mu yendekile tumelo mwa Sika sene si bupile lihalimu ni lifasi. Kuli, lona Linzwi la Hae luli Kasibili la bupa, Mulimu Yana bulezi lifasi kuba teñi, mi

hakuna sika se si tata ku Yena. Kacwalo li mi eza kuba babakona kubupa, mina kasibili, kakuli munga Manzwi a Hae. Mi linzwi ki muhupulo o bonahalizwe.

<sup>29</sup> Cwale, Paulusi na keni mwa buino bwani, kuli mane aba—aba isiñi fela kutwisiso ya buituti wa za bumulimu, fela, kono nabile ni bupaki bwa kuiponela ili yen. Na katani Mulimu, mi a ziba kuli na bizizwe ki Mulimu. Mi—mi hakuna nihaiba yomukana yana mu bulelela sika ka zona. Na kolwa kaniti kuli Mulimu nali Mulimu ona cwalo. Haiba lifasi ne li kaeza fela cwalo.

<sup>30</sup> Mi haiba sikwata se busihu bo, se siliteni mo, sikona fela kuhupula kuli Mulimu usali Mulimu. Yena usakona kualaba mwa taba ye mane inge Mo akonela ku alabela mwa foliso ya Bumulimu kamba mwa sika kaufela. Yena usali Mulimu. Mi haiba lukona kutoma sepo ya luna, mane isi sepo ya luna fela, kono ni—ni munahano o lukile, ku Sa bulezi. Mi lu ziba kuli Ki yona Niti.

<sup>31</sup> Mi sicaba sieza ka lisheha. Ba bonahala kueza lika ka kulibala ze maswe kakuli ba fumani mayendameno, kakuli ki Linzwi la Mulimu. Jesu naize, “Lihalimu ni lifasi li ka fela, kono Manzwi a Ka hana kufela.” Konakuli haiba luna ni Linzwi la sepiso, konakuli hakuna kupalelwa ku Lona. Halikoni kupalelwa.

<sup>32</sup> Kacwalo Ni—Ni lumela kuli kona libaka haluna ni mikopano ya litapelo mo, ba—ba batu ba bulapeli ba mwa Houston, ba iseza ngana, mwa bupilo bwa batu. Mi seo kona se lu kopanezi mo, ki ku—ki ku kubiza mata afitelela mata apangile mutu ni milao a ona, ki nto Yekona kucinca lipilu za batu, sina mwa Na ezelize Faro mwa Egepita. Mi ki Yena—Yena Mulimu. Mi lu lukela kulisela cwale kutalimela fa—fa lika ze maswe, mi lukale kutalimela fa neku lelinde.

<sup>33</sup> Mi musika ba kale ni tumelo, mu lukela kuba ni sesiñwi sa kuba ni tumelo ku sona. Mi ki mwa sikamañi mo mu kona kubeya tumelo ya mina haisi mwa Linzwi la Mulimu yapila, ze bupilwe, mata a Yamata kaufela? Ki mwa sikamañi hape mo lukona kubeya sepo ya luna teñi? Kabakaleo li mieza kubonahala baba shutana, kueza lika ka kushutana. Mu talimela ku Mulimu kuli ataleleze sepiso ya Hae. Mi cwale matata ha taha, sina mo lu bezi cwale, Ki ona matiyelo. Ki sika sakuli—sakuli sa miswala, ki sika se mu tamilwe ku sona. Ki sepiso ye lu tamilwe ku yona, Linzwi la Mulimu li cwalo.

<sup>34</sup> Kuswana fela inge ankora mo ibezi mayendameno a sisepe, mwa nako ya liñungwa. Sisepe sakona kuya si kuka fa liwate. Ankora iinezi kwa pata. Ki yona.... Ya pumula. Mina sicaba kwanu kwa Houston, mupila bukaufi hahulu ni liwate, mwabonanga lisepe ha litaha.

<sup>35</sup> Mi ki kabakalañi ha ba lwalanga ankora yetuna yebukiti cwalo yani? Kono, mwa bona, ha kutaha liñungwa, ona—ona liñungwa le lituna le lisabisa fa liwate, le likona ku nepela lika kwa likamba kafoo kokuñwi, ni ku li pyata, kamba ku li fumpeka mwa mezi a sika tunga; iya kukena mwa mezi a buliba, mi inwelisa ankora yetuna, ye bukiti ye, itamelezwi kwateni kuli ika hoha ni fa lilaho la liwate konji haika swala mwa lilundu leliñwi le li sa bonahali. Fohe kipeto mutuhele mañungwa ani a tundane haiba abata kueza cwalo; sina ni mayendameno. Ankora isweli kokuñwi kwabuse, kono i—i ikumalezi. Mi sina sisepe ni mandinda ha zukuza sisepe, sina ni mayendameno, kakuli si si tamilwe.

<sup>36</sup> Mi cwalo kona mwa inezi ni mutu ya tamilwe ku Kreste ni kwa Linzwi la Hae, mi ki ya lumela Cwalo. Kuna ni mayendameno foo, ki sika se si mu swala.

<sup>37</sup> Mayendameno aswana inge naleli ya kwa mutulo ha mu latehile. Ha mu—Ha mu latehisize nzila ya mina, mi mubata kufumana nzila ya kukuta ka yona, naleli ya kwa mutulo kona mayendameno. Cwale, kuna ni linaleli zeñwi, kono za potolohanga ni lifasi. Sina lifasi ha li li potoloha cwalo, li... za potoloha kuzwa ku zona. Mi ni... Mwa ziba, ona naleli yeswana ya kakusasana ki yona naleli ya manzibwana hape, kakuli lifasi li potolohile fela cwalo. Kono kuna ni naleli iliñwi ye sa shenyangi, mi iinelezi fela fahali. Mi kabakaleo kiya... Ki yona—ki yona naleli ya niti. Haiba mwa ziba naleli ya kwa mutulo, mwakona kufumana nzila ya mina mwa ku zamaela. Kono, oh, fo mutu ki ha latehile, mi ha zibi kuli ukaya nzila ifi.

<sup>38</sup> Cwale, Ni na Naleli ye ni ziba. Oh, yona ifitelela naleli ya kwa mutulo. Mi ka kutamiwa ni kubona Kubateni kwa Hae, hakuna taba kamba mulatehile cwani kamba muinzi kai, mwakona kufumana nzila ya mina ya kukuta ka yona ka zamaiso ya Hae, lani ki Linzwi la Hae. Ki yona nzila ya kuzwa mwa matata kaufela. Ki nzila yeisa kwa kozo. Ki nzila yeisa kwa sifumu. Ki nzila yeisa kwa Bupilo, yona kasibili, ki kulatelela fela ona Naleli ye, yeli Mulena Jesu. Mi cwale, haiba mutamilwe kwa Naleli, Moya o Kenile kona Masupeza nzila aka supeza fela kwa Naleli. Moya o...

<sup>39</sup> Masupeza nzila, a tamahani hamoho kwa naleli ya kwa mutulo yani. Mi nzila fela inosi, hakuna taba kamba ki lyangashitu lelicwani mo muinzi, kamba macacani ki atibani cwani a mi beile mwahali, kamba kuna ni mbundu yecwani kwa liwate, lunaka lwa masupeza nzila lwani, mwakona ku lu supeza kai kaufela ko mu lata, kono luka kuta ni kusupa kwa naleli ya kwa mutulo.

<sup>40</sup> Mi haluli mwa butata, ni kusepa Kreste, kuna ni nto ya niti luli: Moya o Kenile uka lu supeza kwa Linzwi le li ka luise kwa

Naleli ya kwa Mutulo, ni ku lufa lika kaufela zeo lu li tokwa. Ki yena Mayendameno aluna.

<sup>41</sup> Ku muuna ya latehile mwa lihalupa, masupeza nzila kona fela nto inosi ye ka mu zamaisa kuya kwande. Ha luli mwa butata, kuna ni fela nto iliñwi; iswana fela mwa mayemo sina naleli ya kwa mutulo. Haibile fela lifasi liyemi mwa sibaka sa lona, ni kupotoloha cwalo, naleli ya kwa mutulo ika siyala mwa sibaka sa yona.

<sup>42</sup> Mi haibile fela kuna ni Kuyakuile, Kreste ukana aba yena Mupulusi, mi ni nzila ya kuzwela mwa butata kaufela, shutano kaufela, muliko kaufela, lika kaufela. Mi kabakaleo luna—luna, ha lu tamilwe ku Yena, ha lu filikani ni ku ñala inge mo li ezeza lifasi, “Mi, oh, ki sikamañi se lu ka eza ka *se*? Ki sikamañi se lu ka eza ka *sani*?” Lu bonahala mane inge kuli ha luna fo lu yendamezi. Kono mutu ya yendekile moyo wa hae ku Kreste Jesu, sepo ya hae foo, ka kuziba kuli ha kupa Ndate sika kaufela ka Libizo la Hae, “Jesu naize, ‘Ni ka si eza.’” Ani kona mafelelezo.

<sup>43</sup> Ani—an kona mafelelezo. Ki yona amen. Ki ona mayendameno. Ki ona mafelelezo. Fani Jesu hana bulezi kuli, “Mukupe Ndate sika kaufela ka Libizo la Ka, Ni ka si eza.” Cwale, ani kona mafelelezo. Ao ki ona. “Kaufela se mu tokwa, ha mu lapela, mu lumele kuli mwa si amuhela, mukaba ni sona.” Ani kona mafelelezo. Ao kona mafelelezo a zona, mwabona, haiba luli lu yendamezi mi lwa Si lumela, mi lu Mu ezize kuba Mayendameno a luna. Kakuli, Wa ezanga. Ki yena Mayendameno a lu zwisa kwa sabo kaufela. Hakuna sabo haiba luli mu tamilwe kwa Licwe la Myaha myaha.

<sup>44</sup> Hakuna sabo ku mutu yali fa liwate, kamba sisepe si katazwa cwani ki mandinda, haibile fela ankora yani isweli fahalimwa lilundu kwatasi kwani. Kiñi, luli. U ziba kuli sisepe si ka ina fahalimu cwalo. Hasina kuya mwa macwe kokuñwi. Hasina kukena mwa mezi a si ka tunga ni ku mu fumpeka, kakuli sina ni mayendameno a tiyezi fa lilundu leliñwi.

<sup>45</sup> Mi cwale haiba mutu ukona kulapela tapelo ya tumelo, mi uyendamiseza moyo wa hae fa Linzwi la Mulimu, koo, “lihalimu kaufela ni lifasi li ka fela, kono Linzwi lani halina kufela,” hakuna sabo. Ha ba tahe, ba bulele kaufela ze ba bata kubulela. Tumelo yaluna inzi ku Mulimu, Mulimu fela anosi. Lwa lumela cwalo.

<sup>46</sup> Nekuna ni nako fo milao ya micelo fa tafule mwa naha ye neitomilwe ku musali cwana. Ni lumela kuli libizo la hae nelí Emily Post. Cwale, nelí yena mayendameno ku za milao ya kuca fa tafule. Haiba Emily Post nabulela kuli, “Munge manawa a mina mucise ka tipa,” nelí lukela kuba ona cwalo. Zeo nelí zona, kakuli nali yena mayendameno ana sepilwe kwa milao ya kuca fa tafule. Haiba na kali, “Mu nwele tii ya mina mwa mukeke wa lizupa, mi muhupe hamunze munwa,” hakuna taba kamba

li utwahala cwani ku sa swanelia, niteni neli ona mayendameno. Mañi ni mañi na ka latelela kakuli ne ba mutualima kuba yena wa mafelelezo kwa likwala za kuziba kucela fa tafule.

<sup>47</sup> Luna ni kuba ni mayendameno hakuna taba kamba lueza sikamañi. Haiba lukaba ni kuba ni sika kaufela, lu lukela kuba ni mayendameno.

<sup>48</sup> Nekuna ni nako fo taelo ya Hitler neli mayendameno mwa Germany. Hakuna taba kamba mutu ufi kaufela na ka bulela sikamani, linzwi la Hitler neli ona mayendameno. Hanaka bulela kuli, "Ba shwa," ba shwa. Hanaka bulela kuli, "Ba pile," ba pile. Mi hanaka bulela kuli, "Lwaya kwa ndwa," kamba, "Haluyi kwa ndwa," kaufela se lueza, linzwi la hae neli mafelelezo.

<sup>49</sup> Nekuna ni nako fo Italy hane ili mayendameno. Yani neli taelo ya muhapelezi wa puso, Mussolini, sa na bulezi kuli si ezahale. Se ba bulela kuli muzamaisi wa hae, muzuzu ulimuñwi ka kuitahanelia, ku yo munga. A mu kunupa. Kiñi? Ki hali, "Hani lati kuli uno itahanelanga muzuzu ulimuñwi. Ni bata kuli ufitange kuna ka nako luli haikwana, luli handendende." Mwabona? Manzwi a hae neli mayendameno. Italy kaufela neikubama ka yena.

<sup>50</sup> Nekuna ni nako yeo Faro, mwa Egepita, hanali mayendameno. Kono mwa bona...

<sup>51</sup> Kono ona buiketelo bo kaufela sina mo ne ba ezeza neli buiketelo bwa mutu fela, mi kaufela zona ne lina ni kufela. Kiñi? Kakuli ne li si yo mwa swalisan ni buiketo bwa batu... Ne li sa zamaeleti ni Linzwi la Mulimu ka bupilo bwa batu. Ni bata sani, Ni sepa, kuba ni kuyendamena. Haiba lu kulubela kupiliswa bupilo bwa batu, luna ni kutaha mwa swalisan ni Linzwi la Mulimu ni mulelo wa Mulimu ka bupilo bwa batu. Mi nzila fela ye mukona kueza zeo ka yona, ki kufumana Linzwi la Hae, ni ku li lumela, cwale.

<sup>52</sup> Kacwalo, bo Faro bani. Nenili kwa Egepita ha ki kale hahulu, mi Ni sepa kuli neba katile liñokolwa ze mashumi amabeli mwa mubu, kuli ba fumane si—si sibaka fana inanga Faro ka kuba mulena wa lifasi.

<sup>53</sup> Mi bo Heroda babatuna, ni babañwi cwalo, inge ba taha cwalo mwa mukoloko, lu bona fo ne ku wezi mibuso ya bona ni kuiconga.

<sup>54</sup> Kono kuna ni Mubuso ulimuñwi oli fahalimwa mibuso yemiñwi kaufela. U pahami hahulu mwa mahalimu kufitela hausike wa fela. Mi kwateni fo kuna ni Mulena, kuli, yena Ha eza keto ya Hae mwa sika kaufela, mi lu lumela keto yeo, yeo kipeto iba mayendameno. Ku kaba ona cwalo hakuna taba kamba mañi ubulela sikamañi ka sona. Ku cwalo kamita.

<sup>55</sup> Cwale, Kuta yaluna Yetuna kufitisisa. Kuta yaluna Yetuna Kufitisisa, ki—ki yona mayendameno, ki mafelelezo a katulo

ifi kaufela. Cwale, luna ni kuba ni yona. Fokuñwi halukoni ku lumelelana ni buiketelo bwa yona. Inge, neba si ka lumelelana ni mihupulo ya Hitler, ni zeñwi cwalo. Kono niteni lu lukela kuba ni mayendameno ao. Mi mayendameno a na ha ni katulo ki yona Kuta ya Mafelelezo. Likuta za luna za mwa mahae zakona kulika sika kaufela ni kubulela sa *kuli*, kono Kuta Yetuna kufitisisa kona yebusa kaufela zona. Luna ni kuba ni zona. Kakuba na ha, luna ni kuba ni buiketelo bwa yona, kakuli na ha itamehile ku yona Kuta Yetuna kufitisisa ye. Ku lukile.

Lika kaufela lina ni kuba ni mayendameno.

<sup>56</sup> Kana mwa ziba kuli papali ya mbola ina ni kuba ni milao ya yona kuna mayendameno? Eehe. Ki afi mayendameno a papali ya mbola? Mulahisi. Kucwani haiba hakuna mulahisi, mwabona, mulahisi? Hakuna taba kamba tuyemi kai, sibaka sifi se mutualima ka sona ni kubulela kuli, “Inwile,” mi yena uli, “Ne i natilwe,” kihande, ona cwalo kona mo ne ibezi, i natilwe. Kiñi? Kakuli, linzwi la hae, hakuna taba kamba yainzi fa sipula ubulela sikamañi, sa bulezi mutu usili fela. Kikuli inatilwe kakuli ibulezwi kuli inatilwe, mi yena ki mulahisi. Cwale, kucwani kambe nekusina mulahisi? Kwa kuna kuba kulyangana ko ku cwalo, mane lika kaufela liba mwa nyewanyewa, kufitela mane ni papali ya mbola ifeliswa. Kabakaleo, mu lukela kuba ni mayendameno, kuli mube ni papali ya mbola. I lukela kuba ona cwalo.

<sup>57</sup> Cwale, ku lukela kuba ni mayendameno, mwa maseli a mikwakwa. Liseli kona mayendameno, nitaluse, mwa mikwakwa. Kucwani kambe nekusina maseli a mwa mikwakwa? Kamba kucwani haiba maseli a mwa mikwakwa na ka tima, mi kipeto mu matisa mota mwa mukwakwa? Mi mutangana yomuñwi na ya taha neku *le*, mi sa bulela kuli, “Cwale, Ni fitle fa pili. Nina ni kufita ona mwahali mwani.” Mi ali “Ni liyehile kwa musebezi.” Mu bulele ka kuminahana kwa sicaba ni limota, nemukaba ni yona. Kono, mwabona, maseli a mwa mikwakwa kona afeza litaba kaufela. Ki ona ali mayendameno. Haiba liseli ki la mubala wa butala, zamaya. Haiba ki o mufubelu, yema. Kambe nekusina nto ye cwalo sina—sina masweli a mikwakwa, konakuli ne lu kabanga ni mikwakwa ye patehile ye minahani.

<sup>58</sup> Mi ona bwani kona butata bobuli ni tumelo ya Bakreste kacenu. Luna ni mikwakwa yepatehile hahulu, mañi ni mañi inza ipangela milao ya mayendameno a mwa latela.

<sup>59</sup> Mi, luna ni Mayendameno alimuñwi, mi leo ki Linzwi la Mulimu yapila. Ao kona mafelelezo kuyakuile, hakuna taba kamba mutu ubulela cwani.

<sup>60</sup> Se si batile kufita fa sibaka se si swana ni mwa mazazi a Baatuli, mañi ni mañi una ni mukwa wa mayendameno a hae. Kono zeo kaufela za palelwanga, sina bo Faro ni babañwi kaufela.

<sup>61</sup> Kono mayendameno a Mulimu ki Linzwi la Hae. Wa Li fa, “Mi lihalimu ni lifasi li ka fela, kono Lona halina kufela.” Na lata cwalo.

<sup>62</sup> Cwale, haluna nako yeñata, konakuli lu bata fela nako yelikani fela kwa sicaba se si likani se si tile mwa ñalelwa ye, mi mane hañata ki ha kuna ni lifu le li sutelezi, sina mo lu yemezi busihu bo, mi banga mayendameno. Halu buzeni babañwi ba bona.

<sup>63</sup> Halu kuteleni kwa likande la kale le li zibahala hande ku luna kaufela, mwa mazazi foo sibi hane sili se siñata hahulu mwa lifasi kufitela Mulimu aikutwa bumaswe mani a nyikwa ka zona, mi lifasi ne lina ni kusinyiwa. Mi Mulimu afa Nuwe mayendameno, lani neli Linzwi la Hae. Mi, hakuna taba, mayendameno ani neli kupiliswa kwa sicaba. Nuwe na ziba kuli lifasi ne litaha kwa kushwa. Mi Mulimu amufa mayendameno, mi lani neli Linzwi la Hae, cwale, ku lamulela sicaba sa Hae kwa lifu. Cwale, mayendameno neli sikamañi, neli ku lamulela sicaba kwa lifu mwa linako za Nuwe? Neli Linzwi la Mulimu. Ani neli ona mayendameno, hakuna taba kamba mutu ufi kaufela na ka bulela cwani.

<sup>64</sup> Sene ibulezi sayansi, “Hakuna pula mwa halimu mwani. Lwa kona kukunupa fa kweli ka lipangaliko za luna. Hakuna pula kwateri kwani. Cwale pula ika nela cwani?” Haiba Mulimu na bulezi kuli ku kaba ni pula, Mulimu wakona kubeya pula mwa mbyumbyulu, haiba Na bulezi cwalo.

<sup>65</sup> Nuwe aya ku latelela hande musebezi wa hae, inza ishumusa, ni ku lukisa areka kwa kulamulela sicaba. Kakuli, nekuna ni mayendameno ana filwe kwa sicaba, kuli ne ba ka piliswa haiba ne ba nga nzila ya Mulimu ye lukisizwe ya mayendameno aa.

<sup>66</sup> Kacwalo, kasamulaho, linako zeñwi, halu amuhezi mayendameno... Ni bata kubulela se bakeñisa bashemi ba bana baa, ka se Ni bata ku mi bulelela mwa nako nyana fela. Cwale, haiba...

<sup>67</sup> Linako zeñwi, ha lu li amuhezi, lu beiwa mwa muliko, kubona haiba luli lwa Li lumela. Luba—luba... Mulimu kamita uezanga cwalo. Mi Mulimu wa beleka...

<sup>68</sup> Hakoni kucinca tukiso ya Hae, kakuli Linzwi la Hae ki Yena kasibili. “Kwa simuluhu nekuna ni Linzwi, mi Linzwi nali ku Mulimu, mi Linzwi nali Mulimu. Mi Linzwi la ezwa nama mi la to pila mwahala luna. Yena yaswana maabani, kacenu, ni kuyakuile.” Kacwalo, ki Mulimu kamita.

<sup>69</sup> Ha bizizwa kuli Atahe mwa sibaka, kuba ni kezo, mi buketelo bo Aeza, Una ni kusiala ni bona buketelo bwani. Hakoni ku bu cinca, kakuli Yena ha cinci.

<sup>70</sup> Cwale, Na nakona kucinca keto yaka, ni mona mwakona kucinca, kakuli luna luna ni fo lu felela. Kabakaleo, lwa bangni mafosisa.

<sup>71</sup> Kono Mulimu hakoni kucinca keto ya Hae, kakuli Yena hana fa felela, mi keto ya Hae—Hae i petahalile, kamita. Hakoni kubulela kuli, “Ne ni fosize *fa*, mi Ni ka cinca keto ya Ka,” kakuli sikona kubonisa Mulimu kuli wakona ku cinca. Mi Mulimu kanti hakoni kucinca, mane ni lona Linzwi la Hae halikoni kucinca. Yena wa swana, kamita.

<sup>72</sup> Kacwalo, Mulimu na file Nuwe muliko, kasamulaho wa ku amuhela mayendameno a Hae. Nuwe ayo kena mwa areka. Mulimu akwala sikwalo kwa mulaho wa hae. Hakuna kukakanya ne ba bulezi kuli, “Cwale, ka kusasana, ku kaba malu amansu. Mi ku kaba mishika ni mamonyi, mane ni pula ika nela.” Kono, mwa ziba, zazi le litatama, lizazi la pazula sina mo ne li pazulelanga kamita.

<sup>73</sup> Na nahana, balumeli ba sihalihali ba bulela kuli, “Lwa ya kwateri. Muuna muhulu hakulata na bulela niti bakuluna. Kacwalo, mwendi sayansi kona ye neifosize, kuli kuna—kuna ni kutaha pula kuzwa mwa halimu mwani.” Kono, muhupule, ne isa nelangi yali kuba.

<sup>74</sup> Kono, he, zazi la bubeli, lizazi ne li monyeha ka busweu luli sina kamita mone libelanga; la bulalu, la bune, la bu faifi, la bu sikisi, mane ku yo punya cwalo ni lizazi la bu sebene. Kono Nuwe na sa pahami kale mwa ndu ya fa halimu, kuli atalime hande lihalimu. Mi cwale ka kusasana wa bu sebene wani, hane kutile nako, fani sicaba hane si hanile sishemo sa nzila ya Mulimu ya mafelelezo a puluso, ya kulamulela bupilo bwa sicaba, pula ya kala kunela mane misima ya tala mezi. Mi cwale mu—mu mukolo wa kala kunanuha, mi wa isa Nuwe ni babañwi kwa buiketo. Luli, kakuli ne ba sepile mwa Linzwi la Mulimu, ona mayendameno, Linzwi la Mulimu la sepiso.

<sup>75</sup> Hakuna taba mo li bonahalela bumaswe cwani, mo likabela bunsu cwani, niteni mulumele mwa mayendameno a mina.

<sup>76</sup> Mushe, kiñi, za hae, na likile kupiliswa bupilo bwa Maheberu bene ba nyanda bani. Mi nebali bukaufi ni bumaswe hahulu hulu, kamba mane bumaswe hahulu hulu, sina bana bababeli bo lulika kupiliswa busihu bo. Nebali batanga, mi ba bulaya muuna yani ka sipundumukela fela, fo ne ba batela fela kueza cwalo. Mi Mushe autwa mwa pilu ya hae kuli yani neli—neli tato ya Mulimu. Kacwalo, a—a lika kueza cwalo kuya ka tuto. Alike kueza kuya ka mata a hae, mi afumana kuli apalelwaa hahulu. Aeza sika sene si sika luka yena kasibili, kakuli na bulaile mutu. Mi sani ne si si ka luka.

<sup>77</sup> Mi, akena mwa lihalaupa mi aba kwani ka myaha ye mashumi amane. Kono, zazi leliñwi, na sweli kulisa lingu kwa mulaho wa lihalaupa, mi nekuna ni Liseli mwa sicacani. Mi

cwale Mushe ha sutelela bukaufi ni Liselii le, Linzwi la Mulimu la bulela ku yena kuzwa mwa Sita sa Mulilo sene sili mwa sicacani se, mi lali, "Mushe. Mushe."

Mi ki hali, "Kina yo Fa, Mulena."

<sup>78</sup> Mi ki Hali, "Tubula likatulo za hao, kakuli sibaka fo uyemi si kenile. Ni utwile sitongo sa sicaba sa Ka. Ni utwile mukopano wa bona wa litapelo. Ni hupuzi kuli Ni kile na bafa sepiso." Mawi, haiba sani hasikoni kubeya lipilu za Bakreste kutuka mulilo busihu bo! "Kina Mulimu. Ni hupuzi ne Ni sepisize." Linzwi lani mo ne Libezi la Mañolo! Mi ki Hali, "Mushe, Ni ku luma kwateni kuli u yo ba lamulela." Mi Mushe . . .

<sup>79</sup> Kakuli, sina ha Ni bulezi kwa makalelo, ha munga mayendameno a Mulimu ani, li ka mieza kuli mueza lika kuli, kihande, linako zeñwi za bukuba, mwa meto a sicaba. Kana mwakona kunahana cwalo, kuli mutu yana matile kusaba Maegepita, kakusasana o tatami, kasamulaho wa kubona mayendameno aa . . .

<sup>80</sup> Linzwi la Mulimu le ne li bulezi ku yena ka bupaki bobunde, kakuli neli Linzwi. Sepiso neili teni, mi ponahazo ya Mulimu yomituna wa ze bupilwe, mwa Na ezelize limakazo mwa—mwa meto a Mushe, ni kubonisa kuli Nali yena Mulimu wa ze bupilwe.

<sup>81</sup> Mi Mushe, habusa lelitatama, anga musala hae ni ku mu beya fa mule, hamoho ni—ni mwana hae fa noka ya yona. Mi muuna muhulu wa lilimo ze eite za kupepwa, mahaha inge a lepelela kutofita ni mwa teka, sifateho sa hae sa sitenda inge si benya, ni kota ye sikami sikami mwa lizoho la hae, inza ya kuliba kwa Egepita, inza huwa katata mwa na konela inza ya cwalo.

"Uya kai, Mushe?"

"Ni ya kwa Egepita, ku yo hapa."

"U yo hapa?"

<sup>82</sup> Kuhapa kwa mutu alimuñwi! Kiñi? Nana ni mayendameno. Nana ni sesiñwi. Nana ni Linzwi la Mulimu, la na yemi ku lona. Muuna wa lilimo ze eite za kupepwa, ni mule ya hae, ni kota mwa lizoho la hae. Kona fela za na nani kihona. Sina mutu alimuñwi ya yo hapa Russia, kacenu. Kono aya mane ayo hapa, kakuli nabile ni mayendameno. Na ambozi ku Mulimu. Na utwile Linzwi la Mulimu. Mi kiha . . . Taba yateni neli kuli, na ilo koma. Luli. Kiñi? Yani nali ni yena mwa mazazi a bupilo bwa hae kaufela. Neli ona mayendameno.

<sup>83</sup> Hakuna mutu yana ni tukelo ya kutaha fa katala, ku to kutaza Evangelii, konji kuli pili yena kasibili ahate mwa sibaka se si kenile sani, ko kusina kukakanya kamba mutu ya sa lumeli akona kutatulula nzila ya kuipitela kwa Mulimu mo iinezi. Jesu na si ka tuhelela balutiwa ba Hae kukuta, hakuna taba kamba ne ba Mu ziba cwani hande; ba lukela kuya kwa munzi wa

Jerusalema, teñi kwani ba libelele kufitela ba taliswa ka mata a zwa kwa Lihalimu. Ba lukela kuba ni kutwisiso.

<sup>84</sup> Mushe, ka kuziba kuli nali mupolofita, a ziba kuli na huliselizwe ona mulelo wo, kono kusina swalisano ya butu yani, ona Mayendameno ani, sika sene si pakile ku yena kuli hana ya kulo kwani, kuli na ya kwa ku yo lamulela sicaba se. Na si ya swana. Naile kwani kakuli nabile ni mayendameno, mi na ezize ona cwalo fela sa na mu bulelezi Mulimu kuli aeze. Nekusina sabo mwa pilu ya hae, fani ha na nepile linohafafasi, kamba milamu, mi se ifetuha kuba noha. Mi ni balikanyisi ba butu ba taha ni mufuta wa bulumiwa bwa bona, mi ba inepelafafasi mane yaeza lika zeswana. Mushe na ezize ona cwalo fela sa na mu bulelezi Mulimu kuli aeze. Fa nekusina sana lukela kueza kwanda kuyema a kuzize ni kubona fela kanya ya Mulimu. Mi cwale lufumana kuli Mulimu nangile noha ya hae mane ya miza linoha zeñwi zani. Cwalo kona mo ku ezezwa. Na ikolwisisa kuli yena Mulimu yana mu bulelezi kueza ze, na ka mu babalela mwa buino bo bumaswe.

<sup>85</sup> Kana luna busihu bo kikuli halukoni nji, kuya ka mutangana ya file pilu ya hae ku Kreste yani, kuyema fa mayendameno aa, kuli Mulimu wakona kueza ze sa konahali kuba ze konahala? Wakona kucinca lipilu za baatuli. Ki kabakalañi ha lu tulakanga ka buhali, ka lika zeñwi? Halu ngeni Mulimu, pili. Ku likutisa kwa sepiso. Mulimu na li sepi size, kuli—kuli Uka li eza.

<sup>86</sup> Kacwalo, muhupule, Mushe kamita nali mutu ya shutana kakuli na ngile Linzwi la Mulimu ni ku Li lumela. Mi nabile ni sepiso yene filwe ku yena.

Ki babaki bo lukona kupunda? Haluna nako.

<sup>87</sup> Ka kuñola litaba ze, kacenu, Ne ni sweli kuñola kwanu ka za Daniele, ka mo ne kuinezi. Seo nesili sona, neli koto yetuna ye bukiti kuyena kuli—kuli alapeli kwa kalimu kasili. Kono na bile ni tamahano ni Mulimu, mi a ziba kuli Mulimu na kona ku mubabalela.

<sup>88</sup> Bana ba Siheberu, hane ba ka nepelwa mwa ondo yecisa ya mulilo mi ne ba ka ciswa ka buhali bwa mulilo, kucisa ka linako ze sebene kufita sapili. Bona bana ba Siheberu bani ne ba lumela ku Mulimu. Ba bulela kuli, “Mulimu wa luna wakona ku lu lamulela kwa ondo ya mulilo ye.” Kiñi? Neba bile ni mayendameno. Neba bile ni Linzwi la Mulimu.

<sup>89</sup> Mi Mulimu yana kona ku lamulela bana ba Siheberu bani mwa muzuzu wa lifu ni kwa ondo ya mulilo o sabisa, kana ku ka fita kai ka Mwa ka lamulela mushimani yomunyinyani yo wa Sijuda kwa neku le, yali kwa muzuzu wa lifu wani? Kana kucwani ka za Hae... Mi Yena usali yaswana ali Jehova Mulimu yena Yo akile abanga kamita. Luna, sina muapositola Paulusi, wa kona kulemuha kuli yena Mulimu yaswana wa pila kacenu, “Maabani, kacenu, mi kuyakuile wa swana.” Mi,

Bakreste bakona ku kumalela kwa lizoho la Mulimu le li sa cinci, ni ku cinca buino kaufela. Tapelo ya cincanga lika. Sani kona se lubata kueza.

<sup>90</sup> Kana lukona kubulela sikamañi sa Joshua? Kana uka sila cwani Jordani? Kubonahala kuli Mulimu nali muuna wa busole yomunca, mwahala kweli ya Lungu, fani mezi anali amañata cwalo. Kono Yena ali ku Joshua, “Lwala areka mi muye kwapili.” Ona sani kona sa na ezize. Mi Mulimu akasheza Jordani kwa mulaho ni kueza mubu o omile, mi ba zamaya kusila mwabuse mane ba lamulelwa. Mone kuinezi!

<sup>91</sup> Ki kabakaleo Joshua naize, “Haili na ni ba lapa laka, luka sebeleza Mulena.”

<sup>92</sup> Kuli Davida, yena mupatriareka yomutuna yani, mo lu latela kubulela za hae. Haluna nako. Kono, ni linako zeñata . . . Sina ha lu utwile mutu yana bulela nako nyana yefitile ka za Davida ni sibi sa hae, kono kanti kaufela zona ne li swalezwi. Fani hanaya kwa ndwa, mi lu li bisa cwalo, mwa lifasi kuli, “Mayemo na swabile,” mi ba lwanisi nebali babatuna. Mi Davida a lobala fani mwataswa kota, mi afufulewa hahulu, kufitela ha utwa muhuwo o utwahala mwa macacani a murubeni, mi sekutu shutana. Davida ananuha ni kuya kwapili, kakuli nana ni mayendameno luli, kuli na ziba kuli yani neli Mulimu yana mu zamaya kwapili.

<sup>93</sup> Kana halukoni kulapela tapelo ya tumelo ye ka luma Mulimu kwa sibaka sa ba tikitibi bani kulo kwani? Luli, lwa kona. Lu lumela kuli lwa kona, haiba lu swalelela fela kwa mayendameno ani.

<sup>94</sup> “Mo Abrahama na bizelize lika, ze ne li siyo, kuli ne li liteni,” kakuli nana ni mayendameno a sepiso yezwa ku Mulimu, kuli Mulimu na ka mufa wa hae . . . amufe mwana ka Sarah. Mi hanali wa myaha ye mwanda ya kupepwa, kamba wa muuna hanali cwalo, mi musali nanani ye nainte, “Niteni na si ka sitatala fa sepiso ya Mulimu ka ku sa lumela, kono nali ya tiile, inza lumba Mulimu.” Mi lu bulela kuli lu bana ba Abrahama. Fani Abrahama . . .

<sup>95</sup> Halu, bile ni Bibebe inize ñozwi kuzwelela mwa mazazu a bo Abrahama, ni lipaki kaufela ze lubile ni zona kwa mulaho, kuli Jehova ubuluka Linzwi la Hae, kuli Kreste ki Mwana Mulimu. Ki yena Muyemeli mwahala mutu ni Mulimu, mi hakuna muyemeli usili hape kwanda Hae. Mi usepisize kuli, “Ha mu kupa sika kaufela ku Ndate ka Libizo la Ka, si ka fiwa ku mina.” Mi lu ipulela kuli lu bana ba Abrahama. Kanti, “Abrahama na bizize lika, zene liteni, inge kuli haliyo, kakuli na lumela ku Mulimu.” Kaniti luli. Ni lumela cwalo ka pilu yaka kaufela.

Bupilo bwa Paulusi bone bu yendekilwe ku Kreste neli ona mayendameno a hae. Ne bu mu tamale.

<sup>96</sup> Kreste nali mayendameno a zuho, sina ha lu balile fa. Na ize kuli, “Mulimu na itamile ka luci, ku Davida, kuli Na sike

kutuhelela moyo wa Hae mwa lihele.” Luci kona mafelelezo a likaňi kaufela. “Mi A ikonka ka luci kuli Na sike kutuhelela moyo wa Hae mwa lihele, kono na ka Mu zusa.” Mi kabakaleo A sepa Mulimu, mi a kokotelwa; a shwa, a zuha hape, mi a kambamela mwa Lihalimu, kakuli Na lumela ku Mulimu.

<sup>97</sup> Kana lika fita kai, sina ha Na toma mutala, ha lungeni mayendameno a luna! Haiba Kreste naka inga, lika ka sepiso iliňwi yani; kana luna lukona kulinga cwani, babana ni lisepiso ze likiti! Hamoho cwalo ni Mali a Jesu Kreste aliteni kwa ku lukenisa kwa mizamao ya luna, ni ku lutisa mwabuse bwa mwandala wa wa sibi o lu kauhanyize, ka kusa lumela, kuzwa ku Mulimu, ni kulutisa mwa Kubateni kwa Hae, kuli lu ambole ku Yena, kana likona kufita kai zeo! Eeni. Lu lukela kuba ni mayendameno.

<sup>98</sup> Ni nahana ka za alimuňwi ona cwale fa, halunze lu kwala, yani ki George Washington, fani America hane isali yenyinyani mi ne lu lwanela bupilo, bupilo bwa naha yetuna yelunani ye. George Washington nali Mukreste. Nali mulumeli. Ni kwani kwa Valley Forge, Ni bulelewla kuli masole ba America neba nami fela, mwendi sikwata nyana fela sa bona, kona bene bana ni makatulo. Mi maliha na bata, ni moyo wa ku hazela kukangela, mi nuka ne ikangela ni kuba fela libala. Mi ba British nebali kwa neku leliňwi. Mi bupilo bwa naha yenyinyani ye nebuli fa kaufi.

<sup>99</sup> Ki sikamaňi sa na ezize? Yena nali Mukreste. U zwela kwande ka nako ya busihu mi uyo kubama mwa mezi a kangezi, ni kulapela kufitela a kolobiswa ki mezi a litwa ani kufitisa mwa teka. Mi aina ona fani inza lapela kufitela aba ni mayendameno, ili kalabo yezwa ku Mulimu, kuli Mulimu na ka mufa tulo.

<sup>100</sup> Mi ka lizazi lelitatama, Valley Forge ne si sika ku yena. A yo sila fa Delaware, a fita mwa mezi a kangezi ani ni masole baba sika tina litino kwatasi, bakangezi licika, mahutu abona asika tina makatulo inza hatile fafasi, mwa litwa. Mi a yo koma, hana kunupilwe malumo amalalu mwa koti ya hae. Kiňi? Na sepa mwa mayendameno a tapelo ye alabilwe. Amen. Ona makalelo a naha ya luna luli a yendamezi fa nto yona yeo.

<sup>101</sup> Ki butata maňi bobuli ni sicaba kacenu baba ipapata kuli ki Bakreste? Kiňi ha lu lyanganiswa hahulu mwa hola yeswana sina ye? Lusike lwa lyanganiswa. Halubeni masole. Eeni, sha.

<sup>102</sup> Na lapezi kufitela aba ni kalabo. Mi, hakuna nuka ye apesize, hakuna masole babasika tina makatulo kwa mahutu, hakuna taba ka ze ezahala, ne ba ka li koma kakuli Mulimu na bulezi cwalo. Lilumo la tobolo mane la palelwa ku mu bulaya, kuzwa mwa tobolo ya sila. Kaniti. Kiňi? Nabile ni mukopano wa litapelo. Na amuhezi kalabo.

<sup>103</sup> Mone kubezi cwalo busihu bulibuňwi, fani Muapositola Pitrosi hanali mwa tolongo, mi ne ba ka mubulaya kakusasana habusa. Nana ni kushwela mwatasa katulo ye bukiti, sina

Mujuda yomunyinyani hakaba cwalo cwale. Kono ki sikamañi sene ba ezize? Neba ezize nto yeswana yelu lika kueza ni luna mo mwa Houston. Ba ongaonga mukopano wa litapelo kwa ndu ya John Mark. Hane ba sweli kulapela cwalo, Lingeloi la Mulena laya kwa tolongo, ni ku yo kwalula lisipi za tolongo, ni ku kwalula minyako. Mi kwabuse kwani, la lukulula Pitrosi mane azwa, mi ataha kone kuna ni mukopano wa litapelo.

<sup>104</sup> Na lumela, busihu bo, kuli yena Mulimu yaswana yani wa pila. Haiba ha ki Yena Mulimu yaswana, konakuli kuna ni se si fosahalile. Kaniti.

<sup>105</sup> Neli sikamañi sene si ezahalile? Ka mukopano wa tapelo, ka Bakreste baba sepahala bene ba lumela, ni ku lumela kuli Mulimu na ka lamulela muzwale wa bona kwa koto yebukiti yani. Bani neli Bakreste bene bainzi busihu kaufela ni kulobala ka lifateho za bona, ni kulila ni ku lapela.

<sup>106</sup> Sina ha Ni utwile alimuñwi wa bakutazi, fa nako nyana yefitile, yana bulela kuli na ka lila busihu kaufela, busihu kaufela. Butata bwateri, kacenu, sicaba hasina taba. Ba katala, ba ozela. Habakoni nihaiba kuteeleza kwa sebelezo ka mizuzu ye lishumi, nihanyinyani. Kihande, ki—ki sesi fosahalile.

<sup>107</sup> Haiba mulata Mulimu, kihande, kihande, lu lukela kuba baba patehile. Ilukela kuba yona—yona sepo ya luna, litakazo za luna. Ku lukelaa kuba cwalo. Liki kaufela zeli ku luna li lukels kuba mwa lilato la Kreste. Amen. Lu banga hahulu ni buzwa. Lu banga hahulu baba sina tokomelo, kanti lifasi lisweli kushwela kwa mautu a luna. Yeo ki niti. Bupilo bwa batu bu ya bu totobela, kusina Mulimu, mi luina cwalo babasina—babasina tokomelo ka lika. Haibile fela lu ba siemba sa keleke, kona ze lu nahana kuli kona shutano.

<sup>108</sup> Ne ni sweli kuambola ka za Kutaha kwa Kreste, lisunda nyana kwa mulaho, mwa keleke yeñwi cwana. Mi kasamulaho nekuna ni mutu yana ni katani kwa mulaho wa keleke, mi ali, “Muzwale Branham, u sabisize sicaba kwa lifu.”

Se nili, “Kiñi ha Ni eza cwalo?”

<sup>109</sup> Ki hali, “Kihande, u bulela ka za Kutaha kwa Kreste. Ha ni tabelangi kuutwanga lika zani. Nina ni mushimani yomunyinyani kwanu ye Ni nani ni kuuta. Nina ni musizana mwa sikolo.”

<sup>110</sup> “Oh,” Se nili, “Kutaha kwa Kreste kona nto ye kanya hahulu ye Ni kona kunahana.” Kaniti. Mwabona?

<sup>111</sup> Bibele ibulela kuli, “Kaufela baba *lata* kubonahala kwa Hae.” Oh, mawi, ka lizazi leo mubili o shwa wo hauka apala o sa shwi, mi ona ndu ya—ya ya likokwani mo Ni pila mo ika cinciwia, mwa nako nyana, ka kukobya fela kwa liito, ni kuba ni mubili oswana sina wa Hae Luli o kanya! Ilukela kuba takazo ya lipilu za Keleke. Ilukela kuba muuna kaufela ni musali kaufela, abe fa

mulilo, inza kutaza mwa mikwakwa mane kai ni kai, ka kulika kupilisa mioya. Kaniti.

<sup>112</sup> Na hakanyeha haiba luli lu tamehile kwa mayendameno ani elu ipulela kuli luna ni ona. Kana lu talimela fa naleli ye swanela ya kakusasana nji? Haiba lu sepile fela mwa keleke yaluna ni mwa kopano ya luna, silikani saluna; sina lifasi halunze licinca cwalo, liya li cinca hamoho ni lona, kupotoloha ni kupotoloha.

<sup>113</sup> Kono kuna ni Naleli iliñwi ye sa cincangi. Kuna ni nto iliñwi ye sa koni kucinca nihanyinyani, nto yeo ki Mulimu. Mulimu hakoni kucinca. Linzwi la Hae hali koni kucinca. Bibele ya Hae haikoni kucinca. Mi haiba mutu upepilwe ka Moya wa Mulimu, ni Kreste ku yena, uka bulela sepiso kaufela ka “amen.” Yeo ki niti. Luli.

<sup>114</sup> Oh, luli, mukopano wa tapelo kona o lutokwa. Lu lukela kuba Bakreste. Bakreste kaufela balukela kuitusisa ona mayendameno aswana aa, ili Linzwi la Mulimu. Linzwi la Mulimu kona kupila kwa Mukreste.

<sup>115</sup> Jesu naize, mwa Linzwi la Hae kuli, “Ha muina ku Na, Manzwi a Ka aina ku mina, mu kupe se mu lakaza, mi si ka ezwa ku mina.” Munahane ka zona. Ki mayendameno acwani hape o mu ka bata? Muka sepa nto mañi hape yefita zeo? “Ha muina ku Na, Manzwi a Ka aina ku mina, konakuli mukupe se mu lakaza.”

<sup>116</sup> Ku kupa Mulimu kuli abeleke fa pilu ya muatulii yani, kamba ona sikwata sa batikitibi sani, ni kunga mutangana yomunyinyani yani kuzwa mwa muzuzu wa lifu! Haiba lu ka li kupa ka tumelo, ka kulumela, mwa mikopano ya litapelo ye, lukaba ni zona. Kuli, Ni lumela ku Mulimu ona cwalo.

<sup>117</sup> Mi tumelo yaka ye Ni nani ku Mulimu, kona ha Nili kwanu busihu bo. Kona ha Ni kansuzi lika zeñwi, ni kutaha kwanu. Nina ni ku zamaya limaili zeñata busihu bo, kukutela kwa Tucson, Arizona, kakuli Ni tile ku to beya tumelo yaka ku ya mina. Yani ki yena mutu. Ki moyo oli kwabuse kwani. Ki mutu yali mwa butata. Mi luna Bakreste luna ni kuzuhela ku za niti, kutaha kwa tumelo ya niti ya luli. Kutameha kwa Linzwi la Mulimu, ni ku kupa sepiso yani. Eeni, sha. Oh, mawi! “Ha muina ku Na, ni Manzwi a Ka aina ku mina, mukupe se mu lakaza.”

<sup>118</sup> Mi hape, “Haiba sicaba se si bizezwa Libizo la Ka sika kopana hamoho mi si lapela, Ni ka utwa nili kwa Lihalimu.” Mukopano wa tapelo, kona cwalo.

<sup>119</sup> Ni lumela ka kubulela ni muyemeli wa kuta ni muyemeli wa milatu ku muzekisi, kamba baatuli, kamba likwata za batikitibi, kamba kaufela seo sili sona. Yeo ki niti. Kono, muzwale, haiba sepo ya hao itamehile kwa sika sisili kufita ngana fela ya butu, ngana ya batu, nitaluse, luli muka swaba hahulu hulu.

<sup>120</sup> Kono haiba mukona kutama tumelo ya mina mwa sibaka sa kuli mwa ziba, ni kuina teñi fo kulapela kufitela Mulimu a alaba,

mi mane muziba kuli muna ni zona mwa pilu ya mina, kuna ni se si ka ezahala.

<sup>121</sup> Ni boni bafu ha ba zuha kuzwa mwa mandu a maswabi. Ni boni li—li libofu meeto a kwaluha, lizebe za bo shushu ha li tibuluha. Ni boni litaba za kansa yebuhali, hamoho cwalo ni kansa ya kwa booko, mbingwa, baba folisizwe ka mata a Mulimu Yamata kaufela. Kakuli, nebana ni tumelo ya kulumela kuli yani neli Mulimu, Yana ezize sepiso, wakona ku buluka sepiso ya Hae. Yeo ki niti, tumelo ya niti sina yana nani yona Abraham.

<sup>122</sup> Kutameha teñi koo. Kuina fani ni kulapela. Ha ki kuina felafafasi, ni kuli, "Mulimu, lamulela mutangana ya zielehile yani mi u mukutise kwa hae." Kaufela luna neluka tabelawa. Kono luinange ona foo kufitela sesiñwi si ezahala. Oh! Ha ku ezahala sika, kipeto, sepo yani yakona kuwela mwahala sicaba sesili mwa muyaho wo busihu bo, ikone kuwela mwahala luna mwahali mo, tumelo yeñata ni mata a Mulimu, haiba ne lu ka lapela katata, kufitela lu yo punya kwa mululwani wa kwa hae wani, kufitela ona mayendameno ani atuluka, ona Siita sa Mulilo sesi swana sani sene si kopilwe kwanu kwa Houston, ka kamera ya Ted Kipperman, lilimo ze lishumi ka zepeli kwa mulaho. Uteni mwahali mo busihu bo, ka butuna fela sina mwa Na inezi nako yani, ku to lamulela mushimani yani, haiba lukona fela ku li lumela, kakuli Yena wa swana maabani, kacenu, ni kuyakuile. Ni lumela cwalo ka pilu yaka kaufela. Kona ha Ni mo ku to fa tapelo yaka hamoho ni mina kaufela kuli Mulimu abukeleze bupilo bwa bona.

<sup>123</sup> Mi haiba mukona kulapela katata, kufitela muba ni kalabo yetaha, muba ni sepo ye mi kutela, inge Washington mwa na bezi, inge John Mark mwa na bezi, inge Daniele mwa na bezi, inge Mushe mwa na bezi, kufitela muba ni mayendameno, sika se muziba kuli mwakona ku kumalela ku sona, kutuha fo, "Fa mayendameno a Ni ka yaha fateni Keleke ya Ka," mi likuta kaufela mwa naha halina kuhanyeza Zani. Yeo ki niti. Fahalimwa Sona sani!

<sup>124</sup> Yena Mulimu yaswana yana ngile Mujuda wa ngo yesikami inge kashuto yani Paulusi, inza halifile aya kwani kuli a yo bulaya Bakreste mwa koto ye bukiti yesina sisshemo, mi amu cinca mane ku mueza Mukreste ya lateha, yena Mulimu yaswana yani wapila busihu bo, wakona kucinca mulao kuba sisshemo, nako kaufela yeo Atabela kunga muhato o cwalo. Haleluya! Muka ni biza kuli ni mupikuluhi ya kenile, hakuna taba, kacwalo Nakona kukena ku zona nina cwale. Ni lumela yena Mulimu yani. Amen. Eeni, sha.

<sup>125</sup> Mi cwale Mareka 11:22, haiba mulapezi katata. Na ize kuli, "Kaniti, niti, Ni li ku mina, mube ni tumelo ku Mulimu. Ni li ku mina, hamuka bulelela lilundu leo kuli, 'U shimbuluke.'" Haiba ona mayendameno ani ateni ku mina, haina mu tozizwe ka ona

Moya wani otahanga kufitelela zamaiso ya sayansi kaufela ya kwande, kusika ba kale katowati kamba kaemba kafi kaufela, yena Yani yana bulezlika mane za bateni. Mi cwale moyo wa mina ha utamehile ku sani, hakuna sika se si kona ku li tuhelisa. Yeo ki niti. “Mu bulele kwa lilundu le kuli, ‘U shimbuluke,’ mi mu sa kakanyi mwa pilu ya mina, kono mulumela kuli se mu bulezlika si ka ezahala, mwakona kuba ni se mukupile.” Haiba sani ha ki ona mayendameno a ku kumalela ku ona! Kaniti, ki ona. Yeo ki niti, ki mayendameno.

<sup>126</sup> Cwale, naha ina ni mayendameno. Bupilo bwa mina bwa mwa lapa buna ni mayendameno. Kai ni kai, haiba bu kaba ni kufumana sika kaufela, buna ni kuba ni mayendameno.

<sup>127</sup> Lwa itumela ku tuyemeli wa kuta yo. Lwa itumela, oh, baana babañwi kaufela. Yena mubuleli wa linzwi wa musole yo wa mwa California, mi ha ki liñusa le li makaza ni leo! Ni—ni muzwale wa luna yana lika kuisa masheleñi ni lika kaufela, ka kulika kutusa musali wa mubotana yo, mi—mi ni bana ba hae, kuli aba lamulele. Zeo kaufela liiketile. Lwa itumela ka zona, mi ni Na na li yemela.

<sup>128</sup> Kono ki ye fa taba iliñwi ye fitelela seo, balikani, halunze lu kwala mukopano wo busihu bo. Lu lukela kutameha kwa mayendameno amañwi, mukopano wa tapelo fapila Mulimu, ze ka luma tukuluho ku Jehova Mulimu yaswana yani. Yena usali Mulimu yaswana busihu bo sina mwa Na bezi linako zani. Haleluya! Kana mwa lumela cwalo? [Kopano ili, “Amen.”—Mu.]

<sup>129</sup> Ha lu yemeñi cwale, he, mi busihu bo lube ni mukopano wa litapelo mwahali mo, kufitela mayendameno anga sibaka. Lu nanule mazoho a luna ku Mulimu. Mulapele kufita mupunya kwa hae, kufitela mayendameno akena mwa pilu ya mina.

<sup>130</sup> Mulena Mulimu, luma Moya o Kenile wa hao fafasi, mi ulume ni kulamulela banana bani kulo kwani, Mulena. Bainzi mwa libaka za miluti ya lifu. Kuna ni se si libelezi kuezahala, Mulena, mi lu lapela kuli mikopano ya litapelo ye itumbule Mulilo. Na Ku lumela, Mulena. Na amuhela cwalo, mi Ni lumela kuli U lamulela banana bani. Lumeleza cwalo, Mulimu Yamata kaufela. Luna, Keleke ya Hao, lwa kupa, ka Jesu Kreste. Amen.



*MAYENDAMENO* LOZ63-0304  
(A Absolute)

Liñusa le ka Muzwale William Marrion Branham ne li katalizwe lwa pili mwa Sikuwa la Mubulo manzibwana, Liatamanyi 4, 1963, ili fa City Auditorium Houston, Texas, U.S.A., liingilwe kuzwa fa tepu ya magesi ya manzwi kusina ku zusa sika mwateri ku ya Sikuwa. Toloko ye ya mwa Silozi i hatisizwe ni kuhasanyiwa ki ba Voice Of God Recordings.

LOZI

©2019 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)